

## Psalm Wela ma Pari

### *Pariverena*

Mara manamanaina i netawanana rava maḡamaḡau taputapunei ava wela ma pari i girumi wei au bukana. Mai Israel wei welai ma pari i tami ma i teretagogiei da lamnei God i viviborumei.

Wei au bukana wela ma pari tapuna ma tapuna. Ġelau God e viviborumei ma e vovoepaepai ma ana iviaiai aubaina e viviegualauei. Ġelau e vivibaḡa agu ma gagalo aubaina, bo notatawanana aubaina. Wela au ḡelau, rava e raraupari ai gulau aubaina ma god e vivibaḡai da ai ḡavia ita kovoḡi. Ma wela au ḡelau tauamgiruma ana apoapoe ma ana nuabola aubaii God awarina i beubeura.

Ma maraḡela Iesu riwa wei au parii i vaia da i viararamana. Kerisiana wei welai ma parii i welewelei ai au viboruma ma i jimajima.

### **Wela vinevinei**

Psalm 1, 10, 23, 27, 34, 51, 67, 90, 95, 1-11, 100, 103, 110, 103, 110, 119, 9-16 ma 139.

## **Buka Tagogi**

### **1**

#### *Nuaiiai ririwa-kauana*

- 1 Rava viaiainana, lamna eḡa ḡo'apoapoe ravai ita votaḡotaḡoi,  
ma ponai eḡa ita rarautaniḡanei;  
ma vivijiboḡai eḡa awarii ita kiakiala.
- 2 Wate BADA ana tarawatu i vinuaiaiei,  
aupom ma marai e notanota-vaitetei.

- 3 ✨ Tauna me ai, waira au adana gogogona,  
ana au mara e rarauano;  
ma rugurugui eġa ita poipoi.  
Wei ravanana, aiwai anapuna e kaukauana-kauei.
- 4 Wate ġo'apoapoe ravai eġa nanare!  
Tauī me rugurugu, ive i kapupuana-naiei;
- 5 Lamna aubaina ġo'apoapoe taukauei BADA ana  
au etera ita mairi ava,  
ma nanare ġoa apoapoei ta kauei rava jijimani  
ai au dam ita mae ava.
- 6 BADA ġoa aiiai ravai e rarauetaraveni ma e paipaini;  
wate ġo'apoapoe ai etanai au damona, pupui.

## 23

### *Bada taupainiu\**

David ana wela

- 1 BADA taupainiu  
ma eġa aiwai ana voladaġei.
- 2 Gidagida majimajiġai au tepana i vimataveniu,  
ma i raveniu waira au raraunairina au adana.
- 3 Au rewapana e raviravivouni  
ma wavana aiaina aubaina etanai jijimaninei  
i raveniu.
- 4 Avena da gwagwa waguwaguvareina ana naeni,  
wate eġa aiwai apoapoena ana rovoei.  
Aubaina tam au ririvau da am kwapuei ma  
jiġonei e gagaloou ma e vivinaubaiu.
- 5 Aubaiu torela e vokaukauei au ġavia au naoi.  
Oilei kolau u volaġolaġoi da tam u vinuavaineu,  
ma au kelaka i oa-karagelai.

---

✨ 1:3: Jer 17:8      \* 23:: Taupainiu me sipu taupainina.

6 Ee! Riwa kua da am iviaiai ma am  
 raunuapoapoe maemae nonoana awariu  
 ina mae, da au mara au damona.  
 Ma BADA ana au numa ana mae-nonoa.

## 27

### *Voepaepa parina*

David ana wela

<sup>1</sup> BADA au lalalaina ma au tauvilawana,  
 aiwai ana rovoei!  
 BADA au taugagagalo  
 aiwai ana rovoei!

<sup>2</sup> Maranai gō'apoapoei ravaii i gētai  
 da ita vunuiu,  
 au gāvia

aei ina pakana-melei da ina peu.

<sup>3</sup> Avena da sorodia borui ina mae-gariḡuruviu,  
 tau eḡa ana rovo dadana.

Maranai au gāvia i vomairi,  
 tau anina da God ana vivitumaḡanei.

<sup>4</sup> Kua tagogi ava aubaina a vivibaḡa.

Au ḡoana ḡaeḡaena da,  
 BADA ana au numa, boruborumana ana mae,  
 ma ana voepaepai. Au lawana au anatapuna.

<sup>5</sup> Nuabola au marana  
 ina tereḡaḡariu.

Ana gabu au vivivireina, ina tereḡovaḡiu.  
 Ma ola au tepana ina tereu  
 da gāvia eḡa ina vodadaniu.

<sup>6</sup> Ma au gāvia i garigari kwaipipiniu,  
 ana tuvaioedoei.

Da au tempol ana morelanau pulo ana apui  
 BADA awarina.

Ana vinuaiai ma welei ma arei ma ana voepaepai.

- 7 BADA ma rautaniġaneu maranai awarim  
a kwatukwatu,  
ma raunu'apoapoleu ma ma paribelev.
- 8 Au orau u riwa, u pa, "Ma nei da ma raudunelev."  
Tau a paribelem a pa, "BADA a nenei."
- 9 Eġa ma raugovaġeu,  
eġa awariu ma ġaiawa.  
Am taunola eġa ma inana geduaiei,  
au anatapuna tam, au tauagu.
- Eġa ma netawaneu,  
au God, tam au tauvilawana.
- 10 Avena da amau ma alou ita teretawaneu,  
wate BADA ina paina-kau.
- 11 BADA, ma viararamaniu da am ġoana ana kau.
- Ma etanai au ġadaġadarana ma taravainiu  
aubaina au ġavia i maġa
- 12 Tai moruei ma parivairovorovoei  
e vunuvunuiu.  
Lamna aubaina, eġa ma teretawaneu awarii
- 13 A 'ramanei da BADA ana viaiaina ana inanai,  
weka lawalawai ai au do.
- 14 BADA ma vitumaġanei,  
da ma virewapana ma tepam ina tora.  
Anina BADA ma vitumaġanei!

## 34

### *BADA ma viborumei*

- 1 BADA ana vimaēgaēgaeni marana patapatai,  
ma ana viborumana-nonoei.
- 2 Orau taputapune i BADA ana voepapai;  
Vilamolamonai riwau ina nonori ma  
ina vinuai.
- 3 Ona nei ata BADA tana vimaēgaēgaeni  
wavana tana voepae-gogonei.

- 4 A raupari BADA awarina ma i paribeleu,  
awariu rovo anatahui i vaitawanei.
- 5 Aiavoi awarina e inainana,  
taui naoi ina ravilalai  
ma ega melanai ina vitepa-ubaubai.
- 6 Au nota i kwa da a gorei, ma i nonori  
ma nuabola au orau i vaitawanei.
- 7 Aiai da BADA e vivivirana-kauei,  
ana anela taui e inana-vaitetei, ma e vivilawani.
- 8 Taumi ona raudadani ma ona aramanei da BADA  
i aii.  
Taui BADA au gouna maemae nuaiai gaegeaena  
awari.
- 9 Taumi vivitumaganami ega aiwai ona voladagei.  
Lamna aubaina, BADA ona vivirei.
- 10 Lion gauboi mara gela am e irairage,  
wate aiavoi da BADA awarina e vitumagana ega  
ina voladaga.
- 11 Natunatu, ona nei, ona rautanigana,  
ma ana viararamanimi da BADA ona vivirei.
- 12 Taumi o goei da ami lawana ina aii  
ma ina manawa bo?
- 13 Nanare, lamna menami ona paina-melei da ega  
babani apoapoe bo moru ona babaniei.
- 14 Goa apoapoe ona geduaiei ma kua aiaii  
ona kaukauei,  
ma ona voguratei da nuauba lawanana  
ona maeni.
- 15 BADA, matana goa aiaii ravai awari e tereterei,  
ma tanigana e tonetonei mepa da agu e toutouei.
- 16 Wate tauna go'apoapoei ravai e mamae-puputei  
taui ina irage ma rava nuanuai ina vuru.
- 17 Rava jijimanii agu aubaina e viviore BADA awa-  
rina

- tauna e rarautaniġana ma ai vita e vaivaitawanei.
- 18 Tauna rava peupeui, rovorovoi, ma vinuabolai e vivilawani, tauna rava orana i peu kaua e vovoepai.
- 19 Rava jijimani ai nuabola i maġa wate BADA tau i e vovoagui ai au nuabola.
- 20 E inainana-vaitetei da eġa gelamina tagogi ina wanagai.
- 21 Ġoa apoapoe ravai ai apoapoe ina vunumelei, ma aiavoi da ġoa aiiai ravai e gedugeduai, ina kovoġi.
- 22 BADA ana taunola e gagagaloei, aiiai da e nenei BADA au ġouna, kovoġa ina vorei.

## 51

### *David ana rupena*

Mara tagogi, Gulau David ana taunola Uriah awana Bathsheba i tavimatanei da maiteni i matave.

- 1 Oo God, ma raunu'apoapoeleu. Tam nuavaina maemae-nonoana amai.  
 Tam raraunuapoapoei amai  
 au ġo'apoapoe ma notatawanei.
- 2 Au rauaġaiġai ma oġai  
 ma au ġo'apoapoe ma oġa-tawanei.
- 3 Au rauaġaiġai a aramanei  
 marana patapatai a notanotai.
- 4 Kaua apoapoei a kauei.  
 Tam ainelam awarim Ġoa apoapoei a kauei,  
 ma am viwavu lamna riwa kaua.  
 Amapo anina da ma kovoġiu.
- 5 Tau rauaġaiġai, melamelauei da marina

- Au manawa da marina tau ḡo'apoapoe taukaueina.
- <sup>6</sup> Wate tam u ḡoei da riwa kaua au ora-dewadewau ina mae.  
E viviararamaniu da nuaulaula orau ina oai.
- <sup>7</sup> Au ḡo'apoapoei ma oḡa-tawanei,  
ma oḡaiu da ana arapoira da gonu rovena arapoirana ana ḡetawanei.
- <sup>8</sup> Ma riweu da au ḡo'apoapoe u nota-tawanei da ana vinuaiiai ma ana morelana avena \*da gelamiu u viaigaigai, marina ana vinuaiiai.
- <sup>9</sup> Au go'apoapoe ma inana-tawanei ma au apoapoe mirai ma boai.
- <sup>10</sup> Oo God nuanua ma ravivouni da ana vipatutu kaua awarim.
- <sup>11</sup> Eḡa au naom ma tawana-opuneu ma awariu eḡa Aruam Vivivireina ma vaitawanei.
- <sup>12</sup> Vilawana nuaiaina ma ravivouni me au naona nanare aruau ma viaiaini da ana voteletelem.
- <sup>13</sup> Lamnei, ḡo'apoapoei taukauei am kaua ana viararamani, da ina mae-tavirei awarim.
- <sup>14</sup> Oo God, vi'raḡena vitana awariu ma vaitawanei, da am kaua jijimanii ana welei.
- <sup>15</sup> Oo Bada ipiriu ma votawanei da gamou ina vimaēḡaeḡaenim.
- <sup>16</sup> Au pulo, ḡamoḡamo ata apui awarim, wate tam pulo apuapunana eḡa uta vinuaiiaiei.
- <sup>17</sup> Bada, pulo e ḡoeḡoei lamna vilamolamona.

---

\* **51:8:** Au vinuabola lamna me gelamiu wanagaina

BADA, eġa au vilamolamona ma au rupena ma geduaiei!

- 18 Am nuavaina Jerusalem ma viaiaini,  
ma ana gari ma voa-melei.
- 19 Anina ma ai pulo nota aiainei ina vikarena-melei  
da ina kaukauei ma ma vinuaiaiei.  
Tau pulo tapuna ma tapuna ina apui awarim.  
Bull maġamaġau am au aniamapu ina apuapui.

## 67

### *Vieġualau welana*

- 1 Oo God ma raunu'apoapoelelai ma ma viaiainiai,  
ma naom weka ma tereiai da ma voaġuai!
- 2 Da au dobu am kua ina aramanei,  
da rava anatapui au dobu ina aramanei da tam  
ai tauvilawana.
- 3 Rava ina voepaepaim Oo God,  
rava anatapui ina vimaēġaeġaenim.
- 4 Rava anatapui au dobu ina vinuaiai ma ana more-  
lanai ina wela,  
aubaina tam rava anatapui au dobu, kua  
jijimaninei e vivibadei  
ma e paipaini.
- 5 Rava ina voepaepaim Oo God.  
Rava anatapui ina voepaepaim.
- 6 Anina ma doa maura ġaeġaena ina vereta  
ma God ina viaiaina-kaueta
- 7 Riwa kua, God ina viaiainita  
ma rava anatapui au dobu tauna ina vivirei.



## 90

### *God ana taunola Moses ana pari*

- 1 Bada ai animae  
kimta wariāga da marina.
- 2 Tam God maemae nonoana  
muriāi da ola  
ma dobu uta kauēi.
- 3 Tam rava e ririwei da e vipokau, ma e ririwei,  
“Rava ona wanaviraimi”
- 4 Tam awarim madega 1,000 lamna me aupom  
tagogi, i tupo kaua  
me raviravi, ega ita manawa dadana.
- 5 Rava ai lawana e vaivaitawanana laḡilaḡinei me  
rauboni damona.  
Tauī me modu, ubaubanai e raraupairei,
- 6 da e rarata ma e talatalai,  
wate aubigai e ḡiviḡivi.
- 7 Nanare am meji tauai e lagulaguriai ma  
maranai e ḡaiḡaiawa tauai a rovorovo kaua.
- 8 Ai ḡo’apoapoe anatapui au naom u lavaei,  
ai ḡo’apoapoe govagovaḡana, wate anatapuna  
e inainanai.
- 9 Am meji ai lawana i vitupoi,  
ma ai madega laḡilaḡina e kwakwa, a lavutu-  
tawanana.
- 10 Madega 70 i vereta da tana mae,  
mepa da tana virewapana lamna 80;  
Wate wei lamna nuabola ava ina vereta,  
ega tana mae-pora ma tana nae.
- 11 Ega aiāi am ḡaiawa malana ita vai-kauēi.  
Mepa da am ḡaiawa ata aramana-kauēi, lamna  
tauai ata vivirana-kauem.
- 12 Ma nanare, ma viararamaniai da ai lawana i tupo  
kaua,

- ma lamna aubaina awarim nuaulaula  
ana vaia.
- 13 Oo BADA! Ma nememei awariai.  
Ma mae-tavirem, ma vinuabolelai, tauai am  
taunola.
- 14 Ubaubanai marana patapatai am nuavaina  
maemaena ma verelai,  
da ana morelanai ana logoi ai ma ai au mara  
anatapuna ana vinuai ai.
- 15 Madeḡa biaḡa u kovoḡiai, nuaiai ma verelai  
da madeḡana biaḡa a vinuapoapoe ina kovoḡi.
- 16 Tauai am taunola, am nola vivirewapanana  
ma viatataielai.  
Ma natunatuiai am boruma ma viatataiei.
- 17 Ma Bada ata God ana vianina ina viatataieta  
ma ina kau ei da aiwai anatapuna ta kau kau ei  
anona ina tupua.  
Nanare ai nola ma viu ai.

## 91

### *God ata rawena*

- 1 Aiai ravana e nena e Aidamo Telarana awarina  
agu aubaina,  
lamna Vivirewapanana Kaukauana au riri-  
vana ina mae.
- 2 BADA au God awarina ana riwa ana pa, “Tam au  
anigagalo ma au tauviḡavia.  
Tam au God, a vivitumaḡanem.”
- 3 Aubaina tauna, ḡavia ana waro govagovaḡai  
ma numa rarauabubu awarinei ina gagaloemi.
- 4 Tauna papenenei ina tereḡovaḡimi ma papena au  
gabaurina ina gagaloemi;  
ana vipatutu, am rawena ma am anigagalo.
- 5 Waguvara kau ai vi’ni-rovorovoi eḡa  
ona rovoei,

- bo ḡavia madegāi e viviḡavia,  
<sup>6</sup> bo numa rarauabubu waguvara e viviḡavia,  
 bo doria madegāi e viviraḡena.  
<sup>7</sup> Avena da rava tausān au ririvam i peu,  
 bo ten tausān au oiem i peu;  
 wate tam ita vodadana-avem.  
<sup>8</sup> Matamiei ona inana ma ona inanai  
 ḡo'apoapoe ravai ai kovoḡa.  
<sup>9</sup> Aubaina BADA o vaia ami rawena; Ḡetelarana ami  
 taugagalo.  
<sup>10</sup> Eḡa aiwai apoapoena awarimi ina tupua bo  
 au numa ina ḡeta.  
<sup>11</sup> God ana anela ina terei da ina painimi  
 ma ina gagaloemi ami au babara.  
<sup>12</sup> Taui uraiei ina voepaim  
 da aem eḡa ḡaima au tepana ma rauei.  
<sup>13</sup> Taumi lion ma mota ona vovaiubai,  
 lion ḡaiḡaiawai ma mota viviwaiawai  
 ona tugwadagwadai.  
<sup>14</sup> God i riwa i pa, "Aiai nuanuau e vaivainonoei,  
 ana vilawani;  
 ma ana gagaloei, aubaina i aramana-kauei.  
<sup>15</sup> Maranai i kwatu awariu, ana paribelei.  
 Tau kampa ai au nuabola,  
 ana taravaini ma ana voepaepai.  
<sup>16</sup> Ai lawana ana vimanaini,  
 ma au vilawana mamae-nonoana  
 ana viatataiei."

## 95

### *BADA tana welei*

- <sup>1</sup> Ona nei! Tana wela BADA awarina.  
 Ana nuaiaita tana wela God ata tauvilawana  
 vivirewapana awarina.

- 2 Tana nei au naona ma tana viegualaei  
ma welei tana voepaepai.
- 3 Aubaina BADA lamna God virewapana  
kaukauna,  
ma god anatapui e inainana-ġairei.
- 4 Dobu anatapuna au urana,  
guba ġaeġaei doa au orana da ola ġaeġaei au  
tepai.
- 5 Boga tauna ġarinei, tauna i kauei  
ma nanare tauna uranei dobu alalana i tere-  
kauei.
- 6 Ona nei ma tana raudune ma tana vimaēġaeġaeni,  
ae tututa tana tapeġaroei taukaueta BADA awa-  
rina.
- 7 Aubaina tauna ata God.  
Tauta natunatuna. Ana sipu ma  
e ġamoġamoita ana au wapu.
- Mepa da ponana o nonori amadodo,
- 8 ✧E riwei i pa “Eġa orami ona gudui me amamami  
au Meribah;  
me au mutulua au Massah.
- 9 Kampa amamami i ’nanai, kauababai a kauei  
wate eġa ita vitumaġaneu, ma i raudadaniu.
- 10 Madeġa 40 wei kimtana awari amlou i ġaiġai ma  
a riwa,  
‘Wei ravai orai i bagibagi ġaġa!  
Eġa ita rarautaniġaneu.’
- 11 Ana mejiu a parivainuaġani,  
‘Gabu a vokaukauei ami lauvitau aubaina wate  
kampa eġa melanai ona rui.”

---

✧ 95:8: Exo 17:1-7; Num 20:2-13

## 100

### *Voepaepa welana*

- 1 Rava anapupuni au dobu ona logoimi BADA awarina!
- 2 Ana nuaiami BADA ona voepaepaei, ona nei au naona ma ona welei.
- 3 Ona aramanei da BADA anina God. Tauna i kaueta. Ma tauta tauna ġarinei. Tauta tauna natunatuna. God ana sipu ma e gagaloeta me sipu taupainina.
- 4 Ana welami ana au gari ona rui ma voepaepami ana au aniviboru ona rui, ma ona vimaegægaeni.
- 5 Aubaina BADA i aii; natunatuna e vivinuavaina-nonoei, ana vipatutu e mamae-nonoa, kimta au anata-pui.

## 103

### *BADA ana nuavaina*

David i girumi

- 1 Orau taputapunei BADA ana voepaepai. Wavana vivivireina ana voepaepai.
- 2 Orau taputapunei BADA ana voepaepai, kava aiaii i kauei aubaiu eġa nuanuau ina vuru.
- 3 Au ġo'apoapoe anapupui e notanota-tawanei, ma doria awarinei e vivilawaniu.
- 4 Ata irage ma i sinaepaiu ma nuavainei ma raunuapoapoelei e vivigulaeu.
- 5 Au lawana au anapupuna

- purapura aiaii avai i verevereu, au vilaraga  
 marana i raviravivouni me \*manubada.  
 6 BADA ana kaua anatapuna jijimanina.  
 7 Ana oga Moses i viatataiei,  
 ma mai Israel BADA ana kaua vivirewapanai  
 i 'nanai.  
 8 BADA raraunuapoapoena ma ivina aiaina,  
 Eġa laġilaġina amlona ita voġaiġai. Ana nu-  
 avaina maemae-nonoana.  
 9 Eġa mara nonoa ina enita,  
 ma ana amloġaiġai eġa ita mamae-nonoa.  
 10 Anina da ita kovaġa-kaueta,  
 wate i raunu'apoapoeleta da kovoġa eġa  
 ġaeġaena ita verevereta.  
 11 Dobu weka ma mara nore au tepadewadewana.  
 Nanare, BADA ana nuavaina i rata guratana  
 tau da BADA e vivivirei awarii.  
 12 Mepa madeġa e gogogolana da mepa  
 e ġaiġairalana, lamna uama,  
 ma nanare ata ġo'apoapoe vimalana  
 e vaivaitawana-naiei aueia.  
 13 Me ama natunatuna e rarau-nuapoapoelei,  
 nanare BADA natunatuna e rarau-nuapoapoelei.  
 14 Aubaina i aramanei da tauta pokauei i kaueta.  
 15 Ata mara au dobu lamna me modu.  
 Ta gogogo ma ta rarata me berana moduei;  
 16 Anina ma ive i uvena-kapupuei,  
 eġa ita mamae, ana gabu i kwakwava.  
 17 Tau da BADA e voepaepai ana nuavaina maemae-  
 nonoana

---

\* **103:5:** Manubada tawarana waduboi e peupeu ma vouii e gogogo. Me manubada tawarana voui e gogogo nanare tam au lawana e raviravivouni.

- awarii ma nanare noinoii ma ai epaepaia  
awarii
- 18 tauti aiavoi da ana parivainuaḡana bagibagina  
e vovojijini  
ma ana patupatutui tarawatu e vovojijini.
- 19 BADA ana vigulau anikialana au mara i terei,  
ma kampa ana vigulau e vivibadei.
- 20 BADA ana anela, vivirewapanami,  
BADA riwana o rarautaniḡanei ma o kaukauei,  
BADA ona voepapai.
- 21 Anina BADA ana anela marei,  
BADA ona voepapai taumi ana taunola ma ana  
ḡoana anatapuna o kaukauei.
- 22 Taumi anatapumi BADA uranei i kauei, ana au  
vigulau maemaei, BADA ona voepapai.  
Tau nanare orau taputapunei BADA  
ana voepapai.

## 110

### *Gulauna vinevinena*

David ana wela

- 1 ✧ BADA au bada wenanare i riwei,  
“Au oieu ma kiala  
da am ḡavia  
au ae karem ana terei da ma tuvaidoedoei.”
- 2 BADA, am gabemani vivirewapanana Zion \* ana  
parata ina viratai,  
da am ḡavia ma vibadei.
- 3 Am laraga ana nuaii ina verena-melei da  
ina visorodia,  
ma ona ḡae BADA ana ola au tepana viḡavia  
aubaina,

---

✧ **110:1:** Mrk 12:36; Act 2:34-35      \* **110:2:** Jerusalem wavana  
ḡelauna.

ma ami rewapana ina ravivouni ubaubanai patap-  
atana me ubaubanai turuvanina.

4 BADA i parivainuaḡanim ma eḡa nuanuana  
ina virai;

“Tam pīrisi maemae nonoana me  
Melkisedek.”

5 BADA au oiem e maimairi da e paipainim;  
tauna gulagulau ina piaḡi maranai amlona  
ina ḡaiḡai.

6 Dobu nununai ai ḡoa apoapoe ina kovoḡi,  
ma taubeu dobuna ina viḡoi  
ma dobu gulagulai anatapui kolai  
ina viaigwadagwadai.

7 Wate au etanai au vuvura ina uma  
ma rewapana ina verei ma ina vovaiuba.

## 119

### *BADA ana tarawatu boruborumana*

9 Rava vouna menanare lawana aiaina ina maeni?  
Tauna riwamei ina paina-melei.

10 Lamna aubaina a baibaieḡ orau taputapuneḡ;  
eḡa ma votereu da riwam ana geduaiei.

11 Riwam a iaiavi ma au nuanuau a tereterei,  
da eḡa ḡo'apoapoei awarim ana kauei.

12 BADA, a voepaepaim!  
Am tarawatu ma viararamaniu.

13 Ipiriuei ana bababani ma  
am tarawatu anatapui u verevereiu ana jimeḡ.

14 Am tarawatu votelatelana a vinuaiainana-kauei,  
eḡa me vipurapura bo vimane.

15 Riwam ana iavi  
ma ana vinuanotenotei.

16 Am tarawatu a vinuaiaina-kauei,  
eḡa riwam ana voteretawanei.



# 139

## *Bada anatapuna i aramanei.*

David ana wela

- 1 BADA orau u inanai ma au kaua anatapui u aramanei.
- 2 U aramanei mara aiwai a kiala ma a vomairi. Avena au uama wate au nota e araramanei.
- 3 E inainanaiu maranai a babara bo au numa a vivilauvitau. Anatapuna a kaukauei e araramanei.
- 4 Muriai da ata babani tam e araramanei aiwai ana latoni.
- 5 Tam e garigari-kwaipipiniu, ma uram virewapananei e paipainiu.
- 6 Lamna riwa kauana, awariu i aii kaua ma i ġe-dewadewa da kolau i kwauna-kauei.
- 7 Mepa ana nae da Aruam ana raugovaġei? Mepa ana ruba da ana raugovaġem?
- 8 Ata ġae au mara da tam kampa; mepa da i 'rairaġei ai au dobu ata rauviraiu, tam kampa.
- 9 Mepa da ana lave nae au maramatanei, bo mepa madeġa e neneulai,
- 10 avena kampa ma uram ina raveniu, ma am rewapana ina painiu.
- 11 Mepa da ana riwa, "Gimtona ina tereġovaġiu ma lalalaina ina gimtona."
- 12 Wate avena da gimtonana amapo eġa ana raugovaġem. Tam awarim gimtona ina rarana me marai, aubaina tam awarim gimtona ma lalalaina lamna tagogina.
- 13 Tam tupuau anatapuna u voai da alou au manawana u teretagogieu.

- 14 A viviegualauem aubaina tam am nuavainei ma  
am borumei u voa-kaueu! Am rauḡaroḡaro  
i aii,  
A voepaepaim aubaina a aramana-kauei.
- 15 Tam u vivineneḡaneu maranai a tuputupua au go-  
vagoḡaḡana, alou au manawana,  
tam ainelam anatapuna u aramanei.
- 16 Tam u inanaiu muriai da a tupua.  
Aupom biaḡa u vereu da ana mae  
lamna au buka u girumi,  
muriwai da aupom naona i ḡotai.
- 17 God! I piripiri guratana da am nota ana ara-  
manei.  
Am nota kolau i kwauni, eḡa aiwai ḡelaunei am  
kaua ana aramanei.
- 18 I maḡa guratana eḡa me bubu, iavana  
ana kauana-avei,  
avena da ata iava-pai, tau amapo da tam  
ana vivinuanainem.
- 19 Oo God! A ḡoei da ḡo'apoapoei ravai uta virāḡeni.  
Taufiraḡena uta viaḡaḡei da eḡa ina nei awariu.
- 20 Aubaina e vivijiboḡim,  
ma wavam eḡa ita vivivirei.
- 21 BADA, rava e gedugeduaiem, tau ravai  
a gedugeduaiei.  
Tau i eḡa ita voteletelem lamna aubaina tau i au  
ḡavia.
- 22 Tau i a geduaiana-kauei,  
anina tau i au ḡavia.
- 23 Ma tuvirevireu, ma orau ma inana-pai.  
Ma raudadaniu da nuanuau ma aramanei.
- 24 Mepa da ḡoa apoapoe au orau, ma viatataieu,

ma ma raveniu etanai e nenaē au lawana  
maemaē-nonoana awarina.

**Wedau Mark**  
**The Gospel of Mark in the Wedau Language of Papua**  
**New Guinea**  
**Buk Mak long tokples Wedau long Niugini**

copyright © 2010 Wycliffe Bible Translators, Inc.

Language: Wedau

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-08-30

---

PDF generated using Haiola and XeLaTeX on 22 Feb 2024 from source files dated 31 Aug 2023

aa19f3e3-98fb-51fa-9c53-3906edc75f11